

Gvangjsih Minzcuz Bau

ganhhau: CN45-0036 B.2019 Nd.1 Ng.16 liggaueq fouhswt nienz ndwenlab cib'it

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3358期

Gvangjsih Cuengh Gun Song Saw Vah Gyauyuz Gyalai Hagdangz Moq

Mboengqneix, Namzningz Si Vujmingz Gih Gyauyuzgiz laebdingh Vujmingz Gauhcungh, Sanghgyauz Cin Cungsim Hagdangz, Senhhuz Cin Cungsim Hagdangz, Sanghgyauz Cin Sanghgyauz Siujoyz, Sanghgyauz Cin Yihlingj Siujoyz daengj 5 aen hagdangz guh hagdangz Cuengh Gun song saw vah. Daengz neix, Vujmingz Gih hagdangz Cuengh Gun song saw vah gyalai daengz 13 aen, ndawde siujoyz 8 aen, cuhcungh 4 aen, gauhcungh aen ndeu.

Bi 2018 ndwen 8, Swcigh Gyauyuzdingh yaenqfat 《Fueng'anq Hwnjguh Gizdieg Guhyienh Sonhag Cuengh Gun Song Saw Vah Gvangjsih Bouxcuengh Swcigh》, gietdingh aeu Vujmingz, Sanglinz, Cinzdangz, Dwz-

bauj, Denzyangz, Yizcouh, Vanzgyangh, Dunghlanz, Denhdwngj, Sangswh daengj 10 aen yienh(si, gih) hwnjguh baenz gizdieg guhyienh sonhag Cuengh Gun song saw vah, moegbiu dwg "ginggvaq haiguh hozdung hwnjguh, gak gizdieg hagdangz Cuengh Gun song saw vah banhhag diuzgienh ngoenz ndei gvaq ngoenz, aen doih lauxsae Cuengh Gun song saw vah ngoenz hung'ak gvaq ngoenz, gij hozdung gyauyenz sonhag Cuengh Gun song saw vah miz bouhloh haiguh, Cuengh Gun song saw vah son'gyauq sonhag caetliengh mboujduenh daezsang, youq dieg vahdoj bonjdieg caiqlj daengx gih ndaej miz gij cozyung yinxlingx guhyienh", iugouz gak gizdieg "guhndeai anbaiz hagdangz Cuengh Gun song saw vah,

gyalai gij soq hagdangz Cuengh Gun song saw vah, gyalai gij gveihmoz son'gyauq Cuengh Gun song saw vah. Hagdangz cungh siujoyz hengzguh sonhag Cuengh Gun song saw vah mbouj ndaej noix gvaq 10 aen (miz cuhcungh aen ndeu doxhwnj), daj yenzcwz daeuj gangj ceiq noix miz aen bujdungh gauhcungh ndeu hailaeb dangzgoq senjhag Sawcuengh Vahcuengh".

Daengz seizneix, daengx gih hagdangz haiguh sonhag Cuengh Gun song saw vah miz 275 aen, lai gvaq bi 2017 byai 14 aen, ndawde siujoyz 234 aen, cuhcungh 35 aen, gauhcungh 6 aen, hagseng hagdangz Cuengh Gun song saw vah mauhgvaq 14 fanh boux.

(Cinz Gizvwnz)

Nyaengq Guh Buhmyauz Gvaq Cieng



Ndwencieng yaek daengz, Veiz Meizcai canghnyibbuh Buhmyauz Yungzuij Myauzcuz Swciyen, haeuj daengz le mboengq nyaengq nyib guh Buhmyauz, de caeuq 8 boux vunzhong de hwnzngoenz nyaengq hong, vih 800 lai dauq Buhmyauz dinghdan ndaw fwngz miz neix nyaengqfwdfwd. Ciuq cam rox, guh buhmoq gvaq ndwencieng dwg gij sibgvenq cienzdoengj Myauzcuz dangdieg. Ndaw doz dwg ndwen 1 ngoenz 11, Veiz Meizcai caeuq bouxhek daeuj aeu buh haenx caez genjcaz geu Buhmyauz moq ndeu.

(Lungz Dauh/龙涛)

Yizcouh: Cauhmoq Vunqsik Siugai Gya'gvangq Diuzroen Gai Mak

Seizneix cingq dwg seiz makgam baenz, ndwen 1 ngoenz 7, gicej youq aen cehgenh guhhong Aen Gunghswh Mizhanh Hangzmak Sangfungh Gvangjsih yawjraen, geijcib boux vunzhong cingq nyaengq faen leh caeuq baucang makgam, baenz sieng baenz sieng makgam saek ronghsien, aen' aen hung doxlumj neix cingq gyagaenj cang sieng. Buek makgam singjsien neix yaek aeu gai bae daengz daengx guek gak dieg. "Makgam dou hawciengz siugai seizneix cujyau miz Yinznanz, Swconh, Cungzging, Hozbwz daengj hawciengz hung gaicawx mak ndaw guek, ngoenznaengz doenggvaq ci vuzliuz daehyinh bae daengx guek gak dieg

couh miz 50 dun baedauq." Bouxfucwz Aen Gunghswh Mizhanh Hangzmak Sangfungh Gvangjsih naeuz.

Aen gunghswh neix youq Diegsuen Gunghyez Bwzfanghmyau Dwzswng Cin Yizcouh Gih, miz vunzhong 300 lai boux, ndawde ranzgungzhoj miz 20 lai boux. Aen gunghswh neix yungh gij diegvih deih ndei de caeuq gij diuzgienh gyaudoeng fuengbienh, cauhamoq hwnghat vunqsik, cujcz canghseng'eiq buenq mak daengx guek caeuq vunz ndaem mak Yizcouh Gih, Vanzgyangh, Ginhcwnzgyangh Gih daengj dieg cigsoh doiqciep, daplaeb aen bingzdaiz comz soucawx, baucang, siugai youq itheij, haenqrengz cau-

baenz aen cungsim gaicawx mak ceiq hung baihsaebaek Gvangjsih.

Yamq laeng aen gunghswh neix yaek caeuq ngaenzhangz, feizliu gunghswh, vunz ndaem mak ciemdingh hezyi doxgap, vunz ndaem mak ndaej bae ngaenzhangz bauq ciq ngaenz, youz feizliu gunghswh fucwz gunghawj huq ndei caeuq dinfwngz bangcoengh, fugsach gai laeng caezcienz hawj vunz ndaem mak, doeklaeng youz Aen Gunghswh Mizhanh Hangzmak Sangfungh Gvangjsih yungh gyaqcienz mbouj daemq gvaq gyaqcienz hawciengz soucawx makgam, caemhcai baucang caeuq siugai, gajgez gij youheiq raeblaeng vunzlai.

(Cinz Fanghsw)

SIUSIK DINJ

● Ndwen 1 ngoenz 8, Gvangjsih Bouxcuengh Swcigh Banggungz Haifat Bangunhsiz caeuq Gvangjsih Bouxcuengh Swcigh Heiqyienh bae daengz Dasinh Yen banh haenqheiq baenaj—"Dou youq gwnz roen vut gungz gunggeng" vwnzyi yienjok. Ngoenzhaenx, gyoengq bouxyienj biujyienj diuqfoux, Heiqcuengh, siujbinj daengj cezmuuz lai cungj lai yiengh, langhbaej le gij cingsaenz baengh rengz bonjfaenh, doxgiet buekguh vunzlai lajmbanj Gvangjsih, ndaej daengz bouxyawj haen.

(Vangz Dwzminz)

● Ndwen 1 ngoenz 9, Baksak Si Hungsziswvei dangjcihbu, Yougyangh Gih Sinfangjiz dangjcihbu daengj bouhmonz lienzhab haiguh gij hozdung ngoenzdangj cawjdaez dangjyenz haeuj segih "coux ndwencieng soengq raeuj", bae daengz Lungzvang Segih camnai 12 ranz bouxgeq gadog, lwggyax caeuq ranz daegbied hoj miz bingh naek haenx, soengq buhvaq seizdoeng, haeuxsan, youzgnw daengj doxgaiq camnai bae hawj gyoengqde, soengq gij gvansim caeuq raeuj dangj bae hawj gyoengqde.

(Vangz Cwngzgviei)

● Mboengqneix, Cing-sih Si Huzyin Cin banh aen vanjvei lienzvuen gofoux coux cieng moq ginh, gingj, minz. Vanjvei hingzvik fungfouq lai yiengh, miz diuqfoux, siujbinj, yienjheiq daengj, biujyienj ndeiawj ndaej daengz 500 lai boux bouxyawj yienhciegz bekfwngz nyauznayauz.

(Maz Cwngyungz)

● Ndwen 1 ngoenz 8, Baksak Si Lauxnienz Daihag youq Baksak Dijyuzgvanj banh aen hozdung coux ciengmoq comzyienj dungxcaiz, doenggvaq habciengq, diuqfoux, doeg saw, yienjheiq, eu fwen daengj biujyienj dungxcaiz ndeiawj, langhbaej le gij sonhag cwngzgoj Baksak Si Lauxnienz Daihag caeuq gij cingsaenz yienghsiengq angqyangz gyoengq bouxgeq aen si neix.

(Luz Feih)